

Vizyon

SPPF i met Sesel dan Konfizyon

Moto kanpanny eleksyon prezidansyel SPPF ti tre kler: *'En leker pour tou Seselwa.'* Me ki nou pe vwar zis 2an apre? Bilten nouvel SBC in vin parey en telenovela. Tou le swar Seselwa i esper avek pasyans ek lafreyer ki nouvo mezir ankor gouvèrnman pour anonse. Sa ki fer lapenn dan tou sa la, se ki tou sa bann mezir ki ganny anonse i al kont bann gran promes ki Mr. Michel ti anonse pandan son kanpanny e menm ziska tou dernyerman. Seselwa i war tou keksoz pe sere parlo son latet e tou lezour son lavi i vin pli difisil. Annou regard enpe sa bann desizyon e annou konpran zot bann defayans.

Taks lo lentere labank

Dan SNP, nou konpran kwa ki Gouvèrnman pe rod esey fer. Me malerezman sa polisi i al kont sa ki Mr. Michel ti dir, letan i tya pe ankouraz tou dimoun pou fer en seving. Letan en gouvèrnman i anv i ankouraz seving, i pa pran desizyon pour li komans met taks lo lentere ki dimoun i ganny lo son seving. Se la kot i mal, aköz finalman tou dimoun, enkli sa pti baba ki gouvèrnman i donn li R1000 letan i ne, i bezwen pey taks.

Dan SNP nou kwar ki premyerman Gouvèrnman ti devret met en limit lo ki sonm ki pou ganny takse. Par egzanmp, gouvèrnman ti devret dir ki dimoun ki annan plis ki R100,000 dan labank ki pou pey taks lo lentere. Sa tya permet bann ki annan mwens kapab kontinyen ganny maksimòm lo zot kont.

Pey GST lo lwe lakaz

Sa size taks lo lakaz lwe in tou-l-tan en size enportan dan bann diskisyon lo reveni ki gouvèrnman i ranmase. Dan SNP nou n poz kestyon lo aköz bann dimoun ki annan en kantite apartman pa pey okenn taks lo zot reveni. Larepons ki nou ti dekouver ti tre senp: Ti

annan bokou bann dalon SPPF ki ti dan sa biznes. Menm letan Mr. Ramkalawan ti lev sa size dan bidze lannen pase, Minis Finans ti saye e reste trankil. Ozordi gouvèrnman in decide tay deryer tou dimoun, e ankor enn fwa i pa fer triyaz dan bal kafe.

Lo nou kote dan SNP, nou kwar ki gouvèrnman ti devret fer en distenksyon kler ant bann dimoun ki pe lwe en pti lakaz e bann ki annan gran lapartman. I ti devret annan en distenksyon pou nobou protez sa pti dimoun ki pe lwe en pti lakaz. Gouvèrnman ti devret met en nivo reveni pour dimoun pey taks. Par egzanmp, i tya kapab dir ki se selman bann lokater ki ranmas plis ki R5000 reveni avek lwe lakaz ki pou peye. Sa ti pou annan 2 lefe: I ti pou protez tou bann pti proprieter e dezyenman i ti pou protez bann pti lokater. I malere ki SPPF pa enterese avek dimoun, me plito zis avek ranmas larzan.

Pous travayer dan servis sivil

Sa i enn bann desizyon pli fermal ki Gouvèrnman in decide pran. Letan ou swiv sa zistwar byen pre kwa ki ou war? Premyerman se SPPF limenm ki n ranpli servis sivil avek tou sa travayer. Avek sak kanpanny eleksyon, zot in decide anploy plis dimoun, fer tou kalite scheme avek en sel bi: ganny vot. Apre sa, zot in prensipalman swazir dimoun ki pou ganny anploye baze lo kouler politik. I kler pour tou dimoun ki sa i lafot Gouvèrnman limenm, me malerezman se bann fanmiy ordiner ki ti ganny sitan lespwar ki pou soufer konsekans desizyon gouvèrnman.

Dan SNP, nou kwar ki Gouvèrnman pa devret pous okenn dimoun dan Gouvèrnman avan ki i etabli en bon program lantrennman pour ki sa bann dimoun i kapab ganny en lanplwa dan sekter prive. Pour le moman zot pe zis anbet dimoun ek sa mo voluntary departure, kan o-fet

Gouvèrnman in fini decide lekel ki pou ganny pouse.

Dezyenman, Gouvèrnman i devret deza dir nou lekel sa bann lanplwa dan sekter prive ki Seselwa pou kapab gannyen. Par egzanmp i devret kapab publiy tou bann lanplwa dan sak sa bann lenstitisyon. Sa i ava donn en pli gran lankourazman, e an menm tan nou ava konn byen reaksyon sa bann landrwa baze lo bann incentives ki gouvèrnman ti donn zot konsènan anploy travayer etranze. I pa vo lapenn zis dir ki Seselwa pou ranplas etranze kan i annan lezot promes ki n ganny fer.

Koup lasistans sosyal

En lot landrwa kot Gouvèrnman in anons sanzman se dan lasistans sosyal ki dimoun i resevwar. Bord Means Testing i fermen e ganny ranplase par en lot. E dapre SPPF, sa pou pli efektiv e zis dimoun ki dan bezwen ki pou ganny asiste. Me ankor enn fwa kestyon se lekel ki n servi lasistans koman en zouti politik? Eski se pa SPPF ki n servi sa larzan konmsi i ti son prop larzan? Eski nou pa rapel bann bis sekirite sosyal stasyonnen enpe partou pe distribye larzan pour aste vot?

SNP: Lespwar pour Sesel

Sesel i bezwen nouvo direksyon pour li vin en pei prospere, avek en lekonomi ki marse. Pour sa arive, ou bezwen partisipe. Sanzman i bezwen komans par ou. Si ou anv i ki ou zanfan i grandi dan en meyer Sesel, ou bezwen konmela menm pare pour kontribye pour sa arive. In nepli ler pour asize e espere ki sa sanzman i vin kot ou, me se ou ki pour bezwen ede pour al sers li. Pour tou sala arive, SNP i bezwen ou sipor e ou vot. Pa fer menm fot ankor.

Oli senserite Mr. Michel?

Swivan deklarasyon Msye Michel lo SBC apre son vizit Bel Ombre, lepep pe keston senserite son parol. I dir i partaz soufrans lepep Seselwa. Me ki kantite laverite i annan dan sa deklarasyon? I kler ki koman Prezidan, Msye Michel i viv en lot realite konpare avek en travayer ordiner.

Ki deryen fwa oun vwar li dan supermarket STC pe lager dile, lo en bus stop pe esper bis ki pa zanmen vini, ouswa dan lalinny kot PUC pe pey son bill ou menm pe monte desann dan bann biro gouvrenman pe esper larepons pour kek lasistans? Msye Michel i viv dan konfor State House, kot manze son fanmiy i ganny delivre par transpor, son dipen

i vin par helicopter sorti La Digue touleswar e en konvwa ki sivre li koman i bouze.

Anmentan ki i demann lepep pou ini pandan sa moman difisil, Msye Michel i refize mars avek MNA kin ganny elekte Bel Ombre pour vwar bann proze devlopman dan sa distrik. Nou rapel Msye Michel sa sanson ki SBC i kontan zve toule 5 Zen ki dir *annou pa zis koze, annou pa zis sante, annou pa zis kriye annou viv linite*. Lepep pou bezwen ziz ou par ou aksyon.

Msye Michel i senpleman oule fer nou kwar ki i annan en leker pour tou Seselwa. Si sa ti vre i ti ava premyerman pare pour aksepte son responsabilite koman ansyen Minis Finans e la koman Prezidan pour sa

difikilte ki li avek son parti SPPF in met Sesel ladan. Se par zot aksyon dan lepase ki pei in perdi direksyon e tonm dan sa gran trou. I ireponsab lo son par pour zis blanm bann fakter eksteryer e apre dir ler li i a pare, i ava adres lepep. Seselwa i fatige viv dan lensertitid e i anvi konnen ki direksyon sa pei pe ale.

Seselwa ozordi pe demann en kantite keston lo tou sa bann gran deklarasyon ki n ganny fer par Mr. Michel. Finalman tou dimoun pe dekouver ki ant son parol ek son aksyon i annan en kantite kilomet. Soufrans ki sa pep pe pas ladan e sa presipis kot pei pe ale i totalman diferan avek sa bann zoli promes ki Jj ti fer avek lepep. Annou reveye nou tou!

Mme Potter:

“Kile Lopozisyon i nonsense.”

Mme Marie-Louise Potter in finalman admet ki remark parti SPPF pandan dernyen eleksyon pou dir *“kile Lopozisyon, les Jj travay”* ti en remark gaga. Dan Lasanble semenn pase, i ti enplor Lopozisyon pour konpran pozisyon gouvrenman.

Mme Potter ti dekri sitiasyon aktyel Sesel konman *en dezaz ekonomik* e sipli SNP pour donn en koudmen. Apre tou sa lannen ki in defann Jj, la ozordi i admet ki *plis dimoun pe al soufer e pour bezwen welfare*. Se la ki in dir ki sa zafer *‘kile lopozisyon i nonsense.’* Apre ki in ankouraz son bann manm pou azir koman bann yes men, la ozordi i vin dir nou *met pei premye e parti 2em!* Mme Potter, en bon dirizan i diriz par lekzanp!

Debout Travayer Seselwa

Avek sa kantite travayer ki pe ganny forse pou kit sekter piblik e al rod travay dan sekter prive, SNP pe lans en lapel avek tou travayer Seselwa pou organiz zot koman en lafors inifye, ki a kapab debout pour zot drwa. I remarkab ki gouvrenman pa pe adres kondisyon bann travayer, malgre ki i pe fors anviron 2000 zot al dan sekter prive.

I annan konplent ki bokou gran lakonpanyen prive, sirtou hotel, pe pran bann latitid ki zot kapab fer sa ki zot oule, san rann kont lotorite ouswa zot travayer. Parmi bann size gouvrenman i bezwen adrese toudswit se kondisyon travay, saler, lantrennman apropiye pour ranplas bann etranze, fasilite transpor apre ler e kondisyon lizyenn dan landrwa

travay. Fodre pa ki zis bann o zofisye gouvrenman i vin dalon avek sa bann investiser e obliy zot responsabilite anver lepep. Zot pa la zis pour al manze e bwar pour nanaryen avek sa bann sef, me plito pou defann travayer.

SNP i rekonnet kontribisyon tou travayer Seselwa dan nou lekonomi e demande ki tou sa ki nesaser i ganny fer pour protez zot dignite e zot drwa. Nou kont lenterferans politik dan landrwa travay e nou kwar ki tou bann sistenn labi i devret terminen imedyatman. Nou osi kwar ki gouvrenman i dwatet pe garanti proteksyon tou travayer parey lalwa i demande. Yer, SPPF ti deklare ki i en parti ki siport travayer. Akoz ozordi in abandonn travayer Seselwa?

PAS PARTOU

Lager dan Minister

Sa enn i tre delika. 2 o zofisye dan gouvrenman ti fini avek koud pwen dan biro Lendi swar. I resanble ki largiman ti n perdi tou kontrol e finalman koud pwen ki ti mele. Pa dir nou ki sa bann reform IMF ki pe met zot anba sitan presyon ki zot perdi zot kool.

Zil R1 i brile

SPPF in sitan anmenn sa pep ki serten gran maler nepli ganny regarde seryezman. Sa semenn letan Zil Ste. Anne tya pe brile, dimoun ki ti pase tya pe senpleman dir ki Zil R1 pe brile. Sa

kalite latitid in ganny kree par SPPF. Fodre ki nou teritwar i ganny son vre valer.

Zil R1 - Domaz dan milyon!

Sa i tre enteresan. Mr. Francis Savy in ganny Ste. Anne pour R1. Me selman letan dife i pran, zot deklare ki domaz pou ariv en ta milyon. Dan sa ka eski lepep i annan tor letan nou dir ki sa zil i vo en ta milyon? Si zil ti vo zis R1, dan sa ka domaz ti devret 15 sou!

Relax body Capt!

Tou dimoun i dir ki Capt. Savy i tro nervous! Me dimoun i pli enterese avek konbyen i gannyen? Fer nou konn sa gro lapey ki ou gard sekre!

SNP Lottery

WIN WITH THE SNP!

PRIZES

- 1st : Family holiday : Four return tickets to Mauritius + 7 days accommodation on BB
- 2nd : Two return tickets to Singapore
- 3rd : Two nights HB at La Reserve Hotel, Praslin
- 4th : Two nights BB at L'Archipel Hotel, Praslin
- 5th : SR5000 cash
- 6th : SR5000 cash
- 7th : One washing machine
- 8th : One refrigerator
- 9th : One TV set
- 10th : One DVD player
- 11th : One Guitar
- 12th-20th : Consolation prizes

R10/-

Draw on December 20, 2008